

दिनांक : 26.02.2026

समय : 18.45 बजे

- राष्ट्रपति द्रौपदी मुर्मू प्रदेश रा दो दिन रा दौरा सारु आज सिंज्यां जैसलमेर पधारेला-काल संवारे हेलीकॉप्टर 'प्रचंड' मांय उड़ान भरण रो कार्यक्रमं
- राज्य मांय निजी बस ऑपरेटरां री तीन दिन ऊं चाल रही हड़ताल बीचे सरकार समस्या रा बेगा हल री उम्मीद जतायीं
- सुप्रीम कोर्ट न्यायपालिका मांय कथित भ्रष्टाचार रा पाठ वाळी 8वीं कक्षा री किताब माथे रोक लगायीं
- प्रदेश मांय पारो चढबा ऊं सर्दी रो असर कम पड्यो-केई ठोड़ां दिन री बगत पारो 30 डिग्री सेल्सियस ने पार कीनीं

000

राष्ट्रपति द्रौपदी मुर्मू प्रदेश रा दो दिन रा दौरा सारु आज सिंज्यां जैसलमेर पधार रही हैं वां रो काल संवारे देश मांय विकसित लाइट कॉम्बैट हेलीकॉप्टर 'प्रचंड' मांय जैसलमेर वायुसेना टेशन ऊं उड़ान भरण रो कार्यक्रम हैं ओ पहलो मौको व्हेला, जद देश रा राष्ट्रपति सह-पायलट रा तौर ऊं देश मांय बण्या लड़ाकू हेलीकॉप्टर मांय उड़ान भर र सरहदी हलकां रो सर्वे करेलां जैसलमेर यात्रा रे दौरान राष्ट्रपति रो वायुसेना रा अहलकारां अर जवानां सागे बातचीत करण रो ई कार्यक्रम हैं वे काल सिंज्यां पाकिस्तान री सरहद ऊं लाग्योड़ी पोखरण फील्ड फायरिंग रेंज मांय भारतीय वायुसेना रा युद्धाभ्यास 'वायु शक्ति-2026' मांय ई खास पावणी रा तौर ऊं शामिल व्हेलां इण मांय वायुसेना रा 70 ऊं बत्ता लड़ाकू जहाज अर 40 ऊं बत्ता हेलीकॉप्टर मारक बूता रो दरसाव करेलां कार्यक्रम मांय रक्षा मंत्री राजनाथ सिंह, राज्यपाल हरिभाऊ बागडे अर मुख्यमंत्री भजनलाल शर्मा ई मौजूद रेहवेलां

0000

प्रदेश मांय गैर-सरकारी बस ऑपरेटरां री हड़ताल आज तीजा दिन ई चालती रहीं राज्य मांय करीब 35 हजार गैर सरकारी बसां मांय ऊं घणखर रे नी चालण रे कारण जनता आवण-जावण मांय परेशानी व्हे रही हैं खाटूश्यामजी मेळा मांय जावण वाळा जातरूआं ने ई घणी मुश्किल व्हे रही हैं हड़ताल रे कारण रोड़वेज री बसां अर रेलगाडियां मांय मुसाफिरां री तादाद घणी बध ग्यी हैं परिवहन विभाग रा अतिरिक्त आयुक्त ओ.पी. बुनकर आकाशवाणी ने बतायो के सरकार अर बसां वाळां बीचे बातचीत चाल रही हैं ई बीच आज विधानसभा मांय ई शून्यकाल रे दौरान विधायक शिखा मील बराला अर चंद्रभान सिंह आक्या निजी बसां री हड़ताल रो मुद्दो उठायां विधायक कह्यो के हड़ताल रे कारण जनता ने परेशानी व्हे रही है अर सरकार ने हड़ताल तुरत खत्म करावण सारु जतन करणा चाहिजें

0000

विधानसभा अध्यक्ष वासुदेव देवनानी कहयो है के भारत न केवल दुनिया री मोटी ताकत बण रह्यो है बल्कि ज्ञान अर विज्ञान रा हलका मांय दुनिया ने गेलो बता रह्यो हैं वे आज जयपुर रा मालवीय नेशनल इन्स्टीट्यूट ऑफ टेक्नोलॉजी-एम.एन.आई.टी. मांय राख्यी ज्या राजस्थान विज्ञान महोत्सव रा उद्घाटन सत्र मांय बोल रह्या हां

श्री देवनानी ज़ोर दे र कह्यो के नुवी पीढ़ी ने देश री ज्ञान परंपरा सागे नुवा विज्ञान ऊं जोडबा री जरूरत हैं कार्यक्रम मांय मुख्य सचिव वी. श्रीनिवास राज-काज मांय आर्टिफिशियल इंटेलिजेंस रा बधता उपयोग अर भविष्य री योजनावां री जाणकारी दीनीं वे बतायो के भणार्ई-लिखाई अर सुशासन मांय तकनीक काम लेवण सारु गंभीर कोशिश व्हे रही हैं

.....

तीन दिन रा ई विज्ञान महोत्सव रो खास मुद्दो महिलाएं और विज्ञान: विकसित भारत का रोडमैप राख्यी ज्यो हैं

0000

यूनिक आइडेंटिफिकेशन अथॉरिटी ऑफ इंडिया (यूआईडीएआई) गूगल मैप्स माथे अधिकृत आधार केंद्रां री जाणकारी देवण सारु गूगल कंपनी करार कीनीं हैं इण ऊं कने रा आधार केन्द्र री जाणकारी करणो

आसान व्हे जावेलं गूगल मैप्स माथे आ जाणकारी मिलेला के कुण सा केन्द्र माथे नुवा आधार कार्ड बणाया जा रह्या है अर कठै केवल पतो या मोबाइल नंबर मांय बदलाव करायो जा सके हैं ई सागे ई आं केन्द्रां रे खुलण रो बगत, वठे गाडियां ऊबी करण री ठोड अर दिव्यांगजन सारू मुहैया कराया जावण वाळा सुबीता री जाणकारी ई गुगल मैप्स रे जरिये हासिल करी जा सकेलां

0000

सुप्रीम कोर्ट एनसीईआरटी री 8वीं कक्षा री वां किताब माथे पूरी तरह रोक लगा दीनी है, जिण रा एक पाठ मांय न्यायपालिका मांय भ्रष्टाचार रो जिक करी ज्यो हैं अदालत ई किताब री सगळी प्रतियां जब्त करण सागे वां रा डिजिटल रूप ई हटावण रो हुकम दीनो हैं

0000

मध्यप्रदेश रा मुख्यमंत्री डॉ. मोहन यादव आज भीलवाड़ा मांय कपडा कारोबारियां सागे बातचीत कीनीं श्री यादव वां ने मध्यप्रदेश मांय निवेश सारू न्यौतो देता थकां कह्यो के वठे उद्योगां सारू बिजली-पाणी री उपलब्धता अर मजूरी ऊं जुड्या कानूनां मांय खास बदलाव करी ज्या हैं बातचीत रे दौरान भीलवाड़ा रा एक उद्योगपति मध्य प्रदेश मांय निवेश री मर्जी जताई, ज्यीं परां श्री यादव वां ने खास रियायतसं देवण रो भरोसो दिरायो मध्यप्रदेश रा मुख्यमंत्री कह्यो के प्रधानमंत्री नरेंद्र मोदी री अगुवाई मांय दोन्यू राज्य मिल र विकास रा गेला माथे चाल रह्या हैं

000

कोटपूतली-बहरोड़ जिला रा नीमराणा मांय एमएसएमई कारखाना अर गाडियां रा पुर्जा बणावण वाळी फैक्ट्रियां सारू दिसावर मांय बिक्री रा बारा मांय जाणकारी अर सिखावण देवण रो खास कार्यक्रम राख्यी ज्यो जिला उद्योग अर वाणिज्य केंद्र कानी ऊं राख्यी ज्यी ई कार्यशाला मांय वठे रा कारखाना मालिकां ने दुनियाभर रा बाजार, दिसावर मांय सामान बेचण री प्रक्रिया अर सरकारी योजनावां री जाणकारी दीरीजीं ई दौरान कस्टम विभाग, बैंकिंग अर निर्यात संवर्द्धन परिषद रा जाणकार माली मदद हासिल करण अर बीमा संबंधी जाणकारियां ई दीनीं

0000

पाली मांय जिला प्रशासन अर राजीविका री ओर ऊं लगायी ज्या 'राजसखी मेळा' मांय महिला स्वयं सहायता समूहां री सदस्यां कानी ऊं बणायी ज्या भांत-भांत रा सामान री बिक्री व्हे रही हैं राजीविका रा जिला प्रबंधक महेंद्र सिंह मेहता बतायो के ई मेळा मांय लारला पांच दिन मांय करीब 10 लाख रुप्या रो कारोबार व्हयो हैं झालावाड़ री सीमा कंवर बतायो के ई मेळा ऊं वां ने वां रा सामान सारू मोटो बाजार मिल्यो हैं

0000

प्रदेश रा घणखर हलकां मांय दिन री बगत पारो 30 डिग्री सेल्सियस ने पार कर जावण ऊं सर्दी रो असर कम पड़ ग्यो हैं रात री बगत ई तापमान 20 डिग्री सेल्सियस रे आरे-सारे पूगण लाग्यो हैं लारली रात फलौदी मांय कम ती कम तापमान 19 दशमलव 8 अर बाड़मेर मांय 19 दशमलव 3 डिग्री सेल्सियस दर्ज करी ज्यो, हालांकि फतेहपुर मांय रात रो तापमान हाल ई 10 डिग्री सेल्सियस ऊं नीचे चाल रह्यो हैं

ई बीचे सरहदी जिला बाड़मेर अर पाली जिलां मांय दोपहरां री बगत तेज तावडा रे कारण बाजारां मांय आवा-जाही कम व्हेवण लागी हैं खेतां मांय साखां री कटाई मांय लाग्योडा किसानां ने ई तपिश रे कारण परेशानी व्हेवण लागी हैं राज्य मांय सैर-सपाटा री एकली पहाड़ी ठौड माउंट आबू मांय ई दिन मांय गर्मी रो एहसास व्हेवण लाग्यो है, हालांकि संवारे अर सिंज्यां री पोर हल्की टंडक सागे मौसम सुहावणो बण्योडो हैं मौसम विभाग आवता एक सप्ताह ताई मौसम सूखो रेहवण अर पारो तीन डिग्री सेल्सियस ताई चढ़बा रा आसार जताया हैं

0000

जयपुर री सांभर झील मांय वन विभाग री ओर ऊं काल 'सांभर बर्ड फेस्टिवल' मनायो जावेलं इण रो मकसद झील री जैव विविधता अर प्रवासी परिंदा रा प्रति जनता मांय जाग जगावणो हैं महोत्सव मांय ड्रोन, दूरबीन अर स्पॉटिंग स्कोप रे जरिये परिंदा बताया जावेलं नुवी पीढी ने पर्यावरण अर जंगली जिनावरां री जाणकारी देवण रा मकसद ऊं स्कूली बच्चां री सवाल जवाब अर चित्रकला होड राख्यी जावेलं कार्यक्रम मांय लूण बणावण री प्रक्रिया ई बतायी जावेली अर कम मिलण वाळा परिंदां रा बारा मांय फोटो प्रदर्शनी लगायी जावेलं ई सागे ई 'वैटलैंड मित्र पंजीकरण अभियान' ई चलायो जावेलं

000

डूंगरपुर मेडिकल कॉलेज मांय हीमोफीलिया, थैलेसीमिया अर सिकल सेल एनीमिया सरीखी बीमारियां रा बारा मांय जाणकारी देवण सारू एक दिन री कार्यशाला राख्यी ज्यीं इण मांय जाणकार आं बीमारियां रा लक्षण, बचाव अर टेमसर जांच रा बारा मांय जाणकारी दीनीं ईं दौरान 'थैलेसीमिया कुटुंब योजना' रा तैत खुद सेवक संगठन खून री आं बीमारियां ऊं मांदा बच्चां ने गोद लेवण री पहल कीनीं कार्यशाला मांय खूनदान रा महत्त्व रा बारा मांय ईं बतायी ज्यीं

000

जोधपुर रेंज री 44वीं रेंज स्तर री पुलिस खेलकूद होड़ आज पाली मांय सरू व्हीं पुलिस लाइन मैदान मांय व्हे रही ईं होड़ रो उद्घाटन एसपी आदर्श सिद्धू कीनीं होड़ मांय जोधपुर रेंज री 12 टीमां रा करीब 500 खिलाड़ी खेल रह्या हैं तीन दिन री ईं होड़ मांय पुरुष अर महिला वर्ग मांय कबड्डी, फुटबॉल, कुश्ती अर निशानेबाजी समेत भांत-भांत रा खेल व्हेलां दूजी कानी 20वीं भरतपुर रेंज पुलिस गेम्स अर ड्यूटी मीट-2025 आज सवाईमाधोपुर मांय सरू व्हीं तीन दिन री ईं होड़ रो उद्घाटन अतिरिक्त पुलिस महानिदेशक बिपिन कुमार पाण्डे कीनीं एस.पी. अनिल कुमार बतायो के पुलिस गेम्स अर ड्यूटी मीट मांय हॉकी, फुटबॉल, कबड्डी, बास्केटबॉल अर वॉलीबॉल समेत न्यारा-न्यारा खेलां री होड़ां राख्यी जावेलां इण मांय सवाईमाधोपुर, करौली भरतपुर, धौलपुर अर डीग जिलां रा पुलिस वाळा सिरकत कर रह्या हैं

0000